

[Augsburg], 22. Juni 1557

An Johannes Oporinus

UB Basel, Fr. Gr. I 11, fol. 212r.

Steinmann Nr. 704.

Lit.: Husner S. 152, 159.

S. P. D. Xylandri literas desiderasti? en ipsum tibi Xylandrum, de quo nihil scribo, nisi vt eum cognoscas, et si placuerit, vtaris. Cuius hic retinendi, si qua honesta occasio mihi se obtulisset, hominem ingenio, doctrina, industria praestantem, hinc velut in exilium abire passus non essem. Nunc quia vel eius fortuna, vel morositas et imperitia indiciorum, tam voluntati meae, quam eius commodius obsistit, eum tibi curae esse velim, vt soles. Quod addam non habeo. Nam si te Regem Fortuna fecisset, non dubito quin Xylandri et Wolfij omnes satraparum dignitatem obtinerent. Choniatae 2. terniones accepi. Videris mihi correctius excudisse τὰ παραλειπόμενα τῶν προηγουμένων. Sed (ne vati noceat mala lingua futuro) perge vt caepisti, et ad proximum Septembrem nostra absoluito. Quod si me Deus e thermis incolumem et paulò valentiorem reduxerit, omnibus neruis in annotationes Isocraticas, Demosthenicas et Aeschineas incumbam, vt iustum et magnificum volumen graecolatinum, si res tuae patientur, vtrique nostrum ornamento, tibi emolumento, mihi pro epitaphio sit. Nam mea voluntate aliud opus non suscipiam. De domini mei erga te voluntate, scripsi nuper. De meis rebus tum scribam, cum quo loco sim, cognouero. Nunc enim Grammatici certant et adhuc sub iudice lis est. Cum Tradelio per occasionem agam. Quiccelbergius ipse ad te sribet. Fasciculus ad Tatium in meas manus non peruenit. ab Antonianis curatum esse non dubito, per quos tuae mihi literae sunt redditae. Vale. 10 Cal[endas] Iulij 1557

Hiero[nymus] Wolfius
Tuus.